

Almal wat aansoek gedoen het om saam met ons Nagmaal te vier, word hartlik daartoe uitgenooi en ons bede is dat die Here ons ryklik sal versterk met die Woord en Sakrament.

Tema: Ons leer mekaar van Christus sodat ons almal tot geestelike volwassenheid in Hom kan groei.

Ontmoetingsdiens

Intreelied Ps 25-1: 2, 7

Votum

Seën

Loflied Ps 34-1: 1, 2, 6 (tweede mel)

Geloofsbelijdenis Sing Sb 12-3: 1, 2.

Verootmoedigingsdiens

Samevatting van die wet uit 1 Joh 4: 15-5: 5

Gebed

Sing Ps 19-2: 3, 4.

Woorddiens

Skriflesing;: Kolossense 1: 24 - 2: 5

Teks: Kol 1: 27 - 28

Woordverkondiging

Sing na prediking Ps 119-1: 11, 39.

Sakramentbediening

Nagmaalsformulier van Calvyn

Sing Ps 23-1: 1, 3

Nagmaalbediening

Sing aan tafel Ps 116-2: 3, 5

Danksegging.

Antwoorddiens

Liefdegawes

Sing Ps 119-2: 22, 27

Seën

Amen Sb 13-3.

Geliefde brs. en srs. en kinders

Ons almal is bewus van die geweldige kennisontploffing wat saam met die komste van die internet plaasgevind het. Jongste navorsing toon dat 'n mens nie eintlik meer die omvang van die kennisontploffing kan meet nie, omdat die bestaan daarvan beskikbare stoopplek en dus meting oorskry. Om maar net 'n paar syfers te noem: In 2010 is 'n 107 triljoen eposse wêreldwyd gestuur. Dit beteken 294 biljoen elke dag. Die getal webbladsye was by 280 biljoen verby. In 2010 was 2 biljoen foto's elke maand op Facebook geplaas. Navorsers praat nie meer deesdae van die omvang van inligting nie maar eerder van die spoed waarmee jy inligting kan bekom en hulle beweer hierdie spoed van toegang sal elke jaar 70 persent per jaar toeneem!

Ons is oorval met kennis en inligting! Allen Tovler het al in 1970 gepraat van "information overload"! Ek wonder wat sou hy vandag gesê het? Enige jong kind kan met sy of haar selfoon bykans enige inligting wat hy of sy benodig, self bekom. Kinders het amper nie meer onderwysers of ouers nodig om inligting te bekom nie! Kinders leer deesdae vir die ouers hoe om die elektroniese media te gebruik.

Nou die vraag: wat kan die "kerk" my nog leer? Hoe kan 'n dominee in 'n preek, of 'n groep gelowiges in Bybelstudie my iets leer? Hoe wil die kategeet nog werklik vir kinders iets in katkisasie leer? Hulle kan enige iets oor die Bybel of oor geloof self te wete kom.

Geliefdes, die antwoord lê daarin dat kennis alleen eintlik niks beteken nie! Jy moet leer hoe om die kennis wat jy verkry toe te pas in die praktyk van jou lewe! En dit kan boeke of die internet jou nie leer nie! 'n Mens kan 'n bobbejaan ook leer om fiets te ry maar dit beteken nie hy kan die Tour de France wen nie.

Hierdie waarheid is van besondere belang wanneer dit oor Bybelkennis en oor geloofskennis gaan! Ware Godskennis leer jy in verhoudinge! Eerstens in 'n verhouding met Christus en tweedens in verhouding met medegelowiges! En hierdie kennis vind jy nie op Google nie! Daarom gee die Here die opdrag dat gelowiges mekaar onderrig en leer! Gelowiges wat die Here ken en in verhouding met Hom leef en wat mekaar so die ware wysheid kan leer as kerk van Christus.

Geliefdes, die Here leer ons vanmore dat wanneer ons saamkom ons mekaar van Christus moet leer sodat ons almal tot geestelike volwassenheid in Hom kan kom!

Wanneer ons dus in die erediens bymekaar kom of in groepe saam die Woord bestudeer dit gaan dit oor verhoudinge! Ons verhouding met Christus en met mekaar en hierdie geloofskennis het elkeen van ons nodig om reg voor God te lewe. Geliefdes, hierdie is 'n genadegawe wat die Here aan ons gee. Hy gee hierdie opdrag tot lering tot ons almal se groei en geestelike welsyn.

Die doelwit wat Paulus hier stel naamlik "dat ons almal volmaak of volwasse voor Christus moet stel" dui daarop dat nie een van ons hierdie volmaaktheid in kennis

het nie! Die woord wat Paulus hier beteken: perfek, eg, voltooid, volwasse, volmaak. Paulus sê dat dit sy opdrag was en ook sy lewenstaak om alle gelowiges so voor Christus te stel en dit word gedoen deur Christus aan alle mense te verkondig.

En dan gebruik hy twee woorde om sy metode van verkondiging te kwalifiseer naamlik: vermaning en lering. Ons gaan nou net fokus op die tweede een naamlik "lering". En die woord "leer" of "onderrig" koppel hy aan "wysheid". **Ons onderrig mekaar in praktiese lewenswysheid!** Ons moet mekaar leer hoe om in die praktyk van ons lewe in verhouding met Christus te lewe!

Dit is waarom Christus ook die inhoud van die leerplan is! Die geheimenis wat God deur die apostels aan die lig gebring het, **is dat Christus ons hoop op die heerlikheid is.** **Sonder Hom het ons lewe geen betekenis nie en sonder Hom het ons geen hoop op die ewige lewe nie!** Sonder dat ek Christus glo, Hom as my Verlosser en Saligmaker aanneem en myself in gehoorsaamheid aan Hom onderwerp, maak die hele Bybel vir my geen sin nie. Sonder Christus het al die kennis wat ek oor die Bybel het geen betekenis nie!

Uiteindelik sal ook al my kennis wat ek in die wêreld opdoen sonder Christus my niks baat nie. Alles wat ek leer, al die waarhede en dogma, al die wetenskaplike kennis, al die inligting op die internet sal my niks baat as ek dit nie in verhouding met Christus uitleef nie!

Hierdie kosbare "kennis-in-verhouding-met- Christus" gee die Here aan sy kerk! Dit het ons verlede Sondag in Joh. 14 ook gehoor! Die Heilige Gees wat ons die verhoudings-kennis gee, word net aan gelowiges gegee. Die wêreld ken nie hierdie kennis nie – maar elke kind van God kan ken dit en kan dit uitleef. Dit is hoekom Paulus ook in ons teksvers 3 keer herhaal dat hy dit aan elke mens wil gee. Elke kind van die Here moet groei in hierdie verhoudingskennis.

Daarom geliefdes, is dit ons opdrag om mekaar te onderrig en leer hoe om in die praktyk van ons lewe in verhouding met Christus te lewe. Omdat nie een van ons al die kennis en al die gawes het nie, moet en kan ons van mekaar leer. Die Here Jesus het ook gesê dat elke gelowige wat 'n leerling in sy koninkryk word nuwe en ou dinge uit die voorraad van sy kennis na vore kan bring. So leer ons bymekaar!

Brs en srs. en kinders, kom ons wees ywerige leerlinge van Christus! Juis te midde van hierdie geweldige kennisontploffing wêreld waarin ons ook met die leuens van Satan gebombardeer word, moet ons elke geleentheid gebruik om ons deur medegelowiges te laat leer! Elke erediens, elke groepbyeenkoms, elke katkisasieklaas, elke jeugfokus, elke gesprek met 'n medegelowige, is 'n geleentheid om hierdie verhoudings-kennis in Christus te leer! Om my te leer hoe ek kan groei in my verhouding met Christus en hoe ek al hoe meer soos Hy kan lewe! My doelwit moet wees dat ek so perfek moontlik in my verhouding met Christus moet lewe.

Ons lê so baie klem vandag daarop dat ons kinders goed toegerus moet wees met kennis! Ons wil die beste kleuterskool hê, die beste skool, die beste universiteit of tersiêre onderrig, die beste sportonderrig sodat my kind die beste kan vaar in sy of haar lewe! Maar brs. en srs., die Here leer ons vanmore dat al hierdie kennis en al die tyd en geld wat ek aan hieraan spandeer, uiteindelik vir my kind niks sal beteken as ek hom of haar ook nie hierdie verhoudingskennis met Christus in die huis en in die gemeente laat leer nie. En die vraag is: is dit vir ons as ouers ook net so belangrik? Is ons bereid om hieraan net soveel geld en tyd te spandeer?

Hier leer ons ook by mekaar om te onderskei tussen waarheid en leuen. Paulus skryf huis hierdie brief aan die lidmate in Kolosse om hulle te waarsku teen die leuens van die Gnostieke dwalinge wat geleer het dat net sommige mense ware wysheid kan ontdek! En hierdie wysheid moes ontdek word deur deel te neem aan sondige praktyke. Net so wil die duiwel ons vandag met sg. kennis van die wêreld weg te lok van die verhoudingskennis wat ons in Christus moet hê en waarmee ons moet leef!

Geliefdes, so wil die Here ons vanmore ook weer op praktiese manier hierdie verhoudingskennis leer. Op baie prakties manier! Die Here gaan nou vir ons 'n stukkie brood en 'n slukkie wyn aanbied om te eet en te drink. Wat leer Hy ons hiermee? Dit betekent dat net soos wat ek kos eet en daardeur aan die lewe bly, net so kan ek alleen in my verhoudingskennis lewe as ek Christus inneem!

Ek "eet" Christus as ek bely dat Hy my Verlosser is, dat ek in Hom vergifnis van sonde ontvang en dat my lewe net waarde het as ek in Hom lewe en sterwe! Dat Hy die enigste kans is om vir ewig te deel aan die heerlikheid wat God in Hom vir ons gee. Dat Hy sin gee aan alles wat ek ken en weet en ek deur Hom dit in die praktyk van my lewe toepas sodat al hoe meer soos Hy kan word.

Net soos kos my sterk maak, maak Christus my sterk en rus Hy my toe om in hierdie verhoudingslewe met Here te lewe. Wat 'n voorreg om vanmore van Jesus self te leer.

Christus laat ons ook almal saam eet en drink! Daarmee maak Hy ons deel van mekaar en gee Hy ons ook aan mekaar sodat ons mekaar kan leer en onderrig! En die kinders wat nog nie self aan die nagmaal kan deelneem nie, sien en leer en laat hulle leer sodat hulle ook eendag met verantwoordelikheid aan hierdie les kan deelneem.

Geliefdes, wat ons vanmore hier beleef kan net ons as kerk van die Here beleef! Dit word nie aan die wêreld bekend gemaak of gedeel nie, net aan hulle wat in Christus glo en van Hom wil leer. Hierdie kenniservaring gaan jy nie op Google vind nie!

Kom ons ontvang dan nou hierdie praktiese les uit die hand van die Here en word ywerige leerlinge van Hom en van mekaar.

Amen